

長蘆鹽法志

長蘆鹽法志卷十八

文藝 文 詩 紀恩詩

自漢書紀藝文而後之志邵邑者咸宗之以爲是猶俗觀風不啻輜軒徧適也長蘆近依日下仰沐

聖天子之休光其間撰述篇章亦多有可藉資於掌故者詎謂鹽志專司食貨而於茲可在所略乎志文藝

文

重修天津儒學記

巡鹽御史 李 棠

大哉文乎日星以之麗天山河以之奠地上塲下隲高卑

錯陳經緯。互交而陰陽成理。具在於人。崇四術而敷五教。非是罔攸敘也。故建國君民。教學爲先。京師首善之區也。近畿向風之首也。

國家定鼎。燕山南面而聽天下。天津一衛城耳。然直輦轂之東南。地鄰風雨之交。扼川途之衝要。漳衛衆流所深滙。九州萬國貢賦之艘。仕宦出入商旅往來之帆楫。莫不棲泊其境。海濱廣斥。鹽利走於燕晉。趙魏三河。齊魯之郡。履絲曳縞之商。羣萃而托處。自前明來。蕃衍甲於滄瀛間。衛之有學也。以爲庶富之後。不可無教。且五方所輻輳。望天京。

者觀光於是始焉。文治無容或闕也。間者屬開創之始。我
皇清撥亂世而反之正。民瘡痍者漸以起而生聚。猶未興。故闕
闕蕭條。蓋藏寡乏。詩書絃誦之文。輟而不聞。學宮鞠爲茂
草。過者咨嗟嘆之。余以康熙七年戊申。偕孟公巡陟長蘆。
爰蒞茲土。往昔鹽使者留居邸舍。間巡行之役。一再至津。
門而余軫商竈之艱難。念吏弊之叢蠹。大欲整施釐剔之。
始請駐節於斯。以朝夕經紀其政。下車之始。謁

先聖於學。覩廟貌摧頽。堂廡圯壞。慨然於文教之不振。思有以
倡率而鼎新之。視事以後。搜宿弊。除朘削。省額外之科斂。

商竈稍稍寧息。民生計藉以安。乃首蠲薄俸。庀材鳩工。諏吉興作。海防通轉運使以下。聞風樂趨。諸紳士與慕義之民。交相鼓勸。畚揭如雲。斧斤雷動。至康熙八年己酉三月。而告成。堂皇赫敞。櫺星豁牙。房序陰岑。丹碧炳煥。祀事因之。處觀瞻。因以肅今。

聖天子臨幸太學。親行釋奠之禮。

御彝倫堂。聽講經義。首善之地。文治蔚興。而余適以時葺宮牆。新黌序。勸師儒而作多士。俾近畿之域。雍雍乎時聞詩書絃誦之聲。九州萬國。觀光而至者。被中和禮樂之澤。思所以

一道德而同風俗。未必無裨於

盛時文治之萬一也。乃鏤貞珉以紀歲月。而系之以銘。銘曰。
倬彼雲漢。垂天章。邦畿東南。惟津梁。泮宮巍峩。文治昌。作
新廟貌。瞻宮牆。家絃戶誦。士習良。千秋芹藻。流芬芳。

重修滄州儒學記

運使盧紘

滄治於長蘆。舊分二城。滄城濱海。而長蘆居河之溪。相距
四十里。自州治移併於長蘆。稽地理者。但知滄州不復言
長蘆矣。長蘆使者專司鹺政。所隸有鹽場。有竈戶。因有竈
學。有竈生。州另有庠。各不相涉。自州既併長蘆。司鹺者雖

庠之隸州亦得過而問之。滄庠在南門外適當長蘆署前。按滄在漢唐間賢人君子固接踵出而近時人文蔚興德業彪炳有位公卿者矣。有冠南宮者矣。有先對策者矣。雖聯翩不替而膠庠乃發祥地。歲久而圯非所以肅觀瞻也。紘忝斯任爰及乃僚及守茲土者諮諏營度鳩工庀材殿桷廡楹次以修舉。於時州之鄉先生咸樂襄其事。若士若商亦爭慕義以輸歷春徂夏將底厥成。於時巡嵯使者適按部行事郡伯司理暨諸邑令咸集於茲會觀其盛各量有捐塗墍丹雘斯完美無缺。因憶滄庠臨河負海左挹清

衛右控津門。人傑地靈。於斯焉聚。似無容補助其間。然飭
几筵以安神。重師儒以嚴教。凡宦茲土者。固未可諉曰美
鍾自然而我無所事事也。矧學士筮仕牧民。所治非財賦。
卽簿書。其能明於撙節愛養之術。而不肯爲俗吏所爲者。
必其爲聖人之徒也。則大崇儒學。抑曰無忘其本始云爾。
關聖廟碑記

巡鹽御史 嚴曾渠

鹽政於國計爲最鉅。周書入政。一曰食。二曰貨。後世之有
鹽筴。所以利日用。通轉輸。亦食貨之一也。今海宇清晏。財
賦充盈。淮浙河東閩粵皆饒煮海之利。而長蘆密邇都城。

輦下戶口億萬。皆仰食於其地之所出。食鹽之額。至十餘萬引。亦綦盛哉。然供鹽之商既多。人心參差。相爲凌競。强者工於并兼。弱者困於壅遏。利爭於下。而課虧於上。鹽政之弊。自商之擅利始也。比者諸君子力矯其習。創爲公局。議立條約。一以轉運之先後爲鬻鹽之次第。運至於場。各以十鬻其一。爲率。舉才力強毅。公明服衆者一人。以主其事。而特供關公於其中。六神分供於左右。示無所私。可謂詳且善矣。余不敏。曩嘗受

命視嵯瀛海間。仰惟

天子恤商之意。不憚勸勉。欲諸君子敦崇廉讓。相與有成。今聞公局立規條。剏新較。若畫一。竊有厚幸。夫利欲其均。法欲其久。自古良法美意。可以裨國家而維風俗者不少。往往積漸。以至於隳廢。使其繼之者。常如始作之心。則歷久可以不敝。蒙其利者。不亦多乎。余望諸君子。堅明約束。守以終始。無開并兼之風。無成墜遏之勢。公局之垂盛於不朽。可必矣。局始於康熙甲子年。成於乙丑年。其地則有堂有廡。有棲神之宇。有燕寢之所。庖廩廬舍。儼成安宅。爲地三畝。三分。凡屋五十九楹。經其始者。霍君晴嵐。繼之者。李君盤

若孫君建恒。然結構初成。未謀久遠之計。今規模煥然。重勒碑以聿新之者。李子德滋也。是誠足表於後夫。是爲記。

天津河東鹽坨平浪元侯廟碑記

大學士 陳廷敬

海門者海水之所出入也。茲土南距海百餘里。日潮汐兩至。至時水勢澎湃。洶湧逆河流而上。之一出一入。若由戶達。故名海門。津門者。衆流之所滙聚也。古南北之水不通。江河異派。無由相達。自漕通而天下之水。半聚於茲。且河海會流。三汊深遙。更名津門。津通舟楫之利。聚天下之粟。致天下之貨。以利京師。海岸數百里。鹵積成鹽。自畿輔山

左中州之地咸取給焉實一地也而今昔異名時有重輕故名有隱顯耳然其間汪洋巨浸與夫逶迤數千里內無神以主之主之之神非聰明正直靈佑如響者不足以厭天下之心享天下之報禋豐祀於無窮也舊有神廟居河之西威靈赫奕無遠弗届凡南北仕宦商旅之往過茲途者靡不祭祭必虔故舟行一遇急流怒浪危湍驚瀾必仰呼於神如或見之神基靈矣由是祀無虛日庭不能容當夫海之未有明禁也商舶往來檣帆相望幾於蔽日且鹽行任重途遠非巨艦弗勝非神力弗達苟有慢心竟日

不能移咫尺一念虔百餘里可俄頃至故綱人每致敬而有德於神尤甚於仕宦商旅也羣議復建廟於河東厥日孔臧厥基孔陽明宮宏敞齋廬潔清前華表而後寢居以及東西兩序齋庖之房百用具備其一切工費悉取給於綱中專祀也始建於順治己丑季秋迄今三十餘年戴神惠於不替嗚呼聞古凡神有功德於民者明王必加以封祀今神利國惠民彰彰如是厥功偉矣

天子嘉神之績錫之爵曰平浪侯遂勒石作記而繫之以詩乃作詩曰緬維海門禹績不磨易名津門厥功孔多通利屆遠

惟神是呵。如或見之。朱冠義裁。出之坎窞。與以平沲。更其
大者。海不揚波。邦家之利。莫重於嵯。

天子旌功。擊鼓鳴鼙。爵曰平浪。玉冊金科。永清以晏。終平且和。

河東鹽坨平浪侯廟碑

巡鹽御史

余泰來

蓋聞聖人首出。膺璇圖。履坤軸。山川之神。莫不奉若懷柔。
奔走効靈。而崇德報功。亦且錫以封號。載在祀典。烝嘗賡
饗。永遠弗替。所云能捍大災。則祀之。皆有功德於民者也。
天津近在畿輔甸服之地。爲古渤海郡。上應天文析木天
津之躔。百川朝宗。合流歸墟。實當北海海門要衝。歲運漕

米江淮吳楚千萬艘咸賴利涉而煮海權嗟凡北地鹽政
統賴茲土昔人所賦積雪中春飛霜暑路其効靈於海若
者尤大彰明較著焉余以康熙癸酉秋九月奉

天子命巡視長蘆鹽政駐節天津至則循例禋祀海神平浪元侯
廟貌赫奕俎豆維馨越明年甲戌秋八月使事將竣報政
有日諸紳衿商賈鳩貲庀材聿新輪奐廼以神廟落成來
告夫元侯職司巨海較四瀆稱雄長利國惠民厥功甚偉
厥利維普凡舟楫帆檣往來出沒於洪濤巨浸中無顛危
傾覆之患得以充實

天庾佐水衡。濟邊儲以無憂。仰屋者惟神庥是賴。考諸祀典。始封平浪侯爵。再晉元侯號。比諸方岳。歷著顯績。其明德遠矣。廟始建津之河西。今順治間。改建河東。介在鹽坨。以靈佑權。嗟爲諸商崇報尸祝故也。余受事以來。星輶所至。凡直隸齊豫。迫於江南之徐宿。幅員數千里。計課金錢數十萬有奇。幸無廢墜。隕越以歸報。

天子是神之相。余於冥漠以有成勞也。表厥懿顯。勒諸金石。余不敏。其復何辭。迺碑而爲之銘。銘曰。泱泱北溟。王彼百谷。比於岳靈。雄長四瀆。矧茲津門。屬在甸服。翊贊雍熙。聲靈百

族歲濟漕艘牙檣萬舳爰祐睦鹽霜凝雪簇上佐水衡權
翰輦轂元侯崇報煒煌綸軸美奐美輪堅塗丹雘采蘋湘
藻桂馨椒馥壽之貞珉穆清雍肅海波休晃昨爾遐福

西沽浮橋碑記

直隸巡撫

趙宏燮

先將軍在昔駐節津門余時方佔畢習舉子業就順天鄉
試嘗往來衛城北郭外見西沽一渡水勢澎湃行者病涉
卽慨然欲請於先將軍以建浮橋會先將軍奉

命統師討叛不果行及余兩蒙

聖恩監司茲土前後履任未及三載亦未暇以爲然自幼時趨庭

省侍以及宦遊所至。自山左觀察。洊歷方伯。旋卽秉鉞中州。凡經閱津渡。則斯橋之志。未嘗不時存於中。蓋此地上接

神京。爲天下水會。四方舟車之所輻輳。潞河之水。建瓴而下。其水發源塞外。自通州入潞河。與寶坻縣之潮河合流。至此折而東南。其西則諸淀爲桑乾。爲滹。爲清。爲徐。曹。雹。汴。四水爲磁。唐沙三河諸水滙集而徒駭。滏陽亦由此分流。疏派皆自西沽傾瀉。與潞河合。並趨三岔河以入海。其在虹藏角見之時。河流就軌。兩水交觸。尙齟齬不相能。至天

降時雨。百川並漲。諸淀之水奔騰洶湧。如萬馬紛馳爭隘。奪險。又如兩軍疾驅。卒然相遇。前有所拒。後不及停。湍激奮迅。莫可名狀。舟師失戒。恒多覆溺。則斯橋之作。蓋未可已也。余承

天子寵命。自中州移節畿輔。復奉

聖恩。特加總督。凡地方大利大弊。釐剔修復。次第舉行。乃得及於斯橋。於是率先捐俸。屬長蘆運使宋君師曾。天津道朱君綱。鳩工庀材。排列巨艦。橫貫鐵索。施板覆土。南北對峙。坦若康衢。而又相度行艘。時其啟閉。以及鐵貓。麻纜。百物具

備凡用船一十有六計其長二十有六丈糜白金二千餘兩肇於康熙甲午歲冬以乙未夏四月訖工橋成二公歸功於余余曰衆擎則易舉同好則久存余雖一人倡之而藉諸君之力乃得商民子來恐後於以有成尙冀後之人同乎斯好時復修葺則斯橋庶幾其可久也而余伏念先將軍總統

王師削平滇黔功著旂常而余又蒙

聖天子永念前人之烈特優

簡拔再世秉旄得縻祿於此以報

君之恩繼親之緒斯橋之作余實有厚幸焉而二君部署纖悉具
有條理其勤於職又可知也用伐石刊事並勒慕義商民
姓名於碑之側

修築渠黃口堤岸碑

竊聞堤以禦患貴防之於未然石以頌功實垂之於永久
故慶宣房之福則沉璧刑牲而將明德之思亦勒鐘刻鼎
於今爲烈振古如茲乃者三衛鑾儀早歸樂國渠黃口岸
復見安瀾雖築之當年曾讀庭燎之舊記而修於此日實
荷各憲之洪規自關帝廟至書院之前共二百四十餘丈

計土木資並工匠所費約二千數百多金始於去歲暮春之初終於卽年七月之朔凡四閱月告厥成功於是勒之貞珉并以誌其材用庶幾無窮恩德同堤工而長存不朽聲名與河流而俱永云爾。

重修龍王廟記

巡鹽御史
莽鵠立

予今而知天之申命保佑神之誠通感召有如斯之靈且速耶。今年春天不雨。

天子親徂郊圻。

警蹕旋臨而雲油雨沛澤乎四方。詩曰。農夫有慶。萬壽無疆。

天下頌焉。夫川后嶽瀆之所以効靈以

聖人之心卽天心。故感通而佑命之。其靈且速如此。越兩月仲夏。天津蓂爾區或耘或耔之後。東南其畝重望雲霓。是時也。百穀旣播。二麥未登。予思天津爲

神京畿輔。人烟輳集。秋斂無望。則黎民阻饑。予方以爲憂。詢知鹽關之南有龍神祠。爲靈昭昭。予亟聞於元戎徐公。兩觀察年公。段公及同城文武羣僚庶士。卽於是月二十有七日庚子。以禋祀告於神。而衆商亦從予禱焉。厥明辛丑二十有八日。尙烈日炎風。迨至未刻。雷起兌方。霖雨

如注。自申至夜分方止。四野霑足。及入五月。長霤泔泔。又
日以相繼。前之喜雨。至是而愁霖。向之憂旱。至是而苦澇。
矣。予復憂之。六月朔壬申。予再禱以求晴。越朝果薰風自
南。雲斂日霽。於是津之衆商觀神之靈。且速如此。皆曰。子
之誠。有以感召之也。咸歸功於子。予進而曉之曰。雲行雨
施。天下平者。

聖天子之神運也。雨暘時若。百靈効順者。

聖天子之德化也。今之旱而雨。雨而晴。感應如響者。天之申命保
佑也。予何有焉。衆商復爲予請曰。公不有其功。神惠宜報。

也。請公題額以昭其靈。吾儕捐資以新其宇。予忻從其議。卽首爲捐金。元戎觀察諸公皆樂助以成衆商之志。予因爲記以壽石。俾後之覽者知神之奏績於

清時商之慕義於不朽皆仰體

聖天子之精誠感召以惠此一方。自此天不屯膏地無遺利時和歲稔海不揚波

聖澤汪洋永永無極皆於是乎兆且望後之人虔修廟祀以傳神惠於無數焉

重修院署記

巡鹽御史
芥鵠立

雍正元年五月十三日。予奉

命巡視長蘆鹽政。時蘆商疲困。公私逋負不下百十餘萬。案牘山積。先是

皇上旣命管侍衛內大臣公。今刑部尙書阿公。監察御史年公。鞠審官商虧欠。又

命予來經理其事。

聖訓諄切。務期徹底澄清。予履任後。曉夜思維。隨以加鹽免課。通融帶運。展限奏銷。借帑收鹽。接濟滄商數事。面奏於

朝。俱蒙

俞允。凡可恤商裕課者。不惜殫盡心力爲之籌畫。商困稍甦。予固屏絕苞苴。卽一切麾仗亦無所用。又不欲廢向來制度。因令收藏以俟後人。至鋪設物件。除銀器現具錦緞之屬。當卽發還。惟錫器木器磁器留用。亦召吏登記以便差竣給領。至於衙署之傾圯頽廢。固已安之矣。次年二月。予東巡留駐濟南者兩閱月。衆商乘時集工繕修。予聞之。卽傳諭寧樸毋華。不得妄費。及還而見署內之傾者已正。頽者已整。甃石砌磚。易瓦繚垣。庖湑廁廡靡不完聚。署後舊有射圃。在荒草中。客至較射。則取葦蓆以避風日。至是築室三

楹址三層牆四圍。予因題所居南室曰敬事堂。取論語敬事後食之意也。予舊以名寧夏署。今涖此地。仍以名之。題射圃室曰繹志軒。取禮記射者各繹己志之意也。衆商若勤勤爲予計者。夫予以身許

國。卽家事且不問。衙署美惡。更勿留意也。故始而傾圯頽廢也。安之繼而易舊爲新也。亦安之。今蒙

聖恩再留任二年。然日月如梭。此室乃傳舍也。豈因繕修而以商人爲德哉。但予素惡新舊交代之際。苟可攜者。則捆載而去。其難致者。則濫給輿皂。甚至櫺扉磚瓦之類。亦恣行殘

毀非必出自居官者之意。大概繫無知僕從所爲。予旣惡此故嚴約下人。時加愛惜。使去任之日。一如方新之日。并勒石以囑後之居是任者。各飭其家人下役。不得恣意殘毀。一以念商艱。一以惜己福。幸勿謂予之饒舌也。

環水樓記

巡鹽御史 莽鵠立

天津公署最後歸然而高者曰環水樓。蓋取河流滌繞圍環若帶之義也。其天晴氣朗。月夕風晨。雲霞燦爛。烟火參差。路轉檣迴。帆影拂檻。至若波潮上下。忽盈忽虛。依稀乎海上三山。蜃樓百幻。前人之經營是樓而領略斯境者。應

有同情乎。予自癸卯仲夏奉

命而來。至甲辰差竣。又蒙

旨特留。公餘之暇。得以時爲登覽。西北則

皇都壯麗。凜然思

天威咫尺。懼無以勝付託之重。伸報効之誠。東南濱海。嵯商之所
輻湊。竈丁聚族而居焉。憑眺興思。利何以振之。弊何以櫛
之。豪强者何以鋤之。善良者何以植之。困苦者何以恤之。
流離者何以鳩之。豈止游觀之助已乎。予嘗論孔子之取
水曰。水哉水哉。而孟氏以爲取其有本。此特爲徐子言救

其失耳。夫水之取類大矣哉。潤槁滋枯。於德爲仁。壯往直前。於德爲義。避高趨卑。於德爲禮。深潛變動。於德爲智。應日從時。於德爲信。如其從欲無厭。則爲貪泉。壞人自利。則爲盜泉。納污藏垢。則爲濁流。嚙隄殺稼。則爲毒流。一塵不染。則爲清波。之潔萬物咸資。則爲流澤之長。睹斯水也。亦各視其所取耳。後之登是樓者。當使臣心似水。無曰魚鹽之利。涓涓不息。可以自潤爲也。庶於環水之稱。顧名而審厥義也乎。是爲記。

天津祈雨疏一

巡鹽御史 莽鵠立

疏爲叩祈雨澤事。竊聞天運之有不齊者。唯神足以挽之。
人力之所不逮者。唯神足以拯之。是以有求必應。而隨感
斯通。欽惟尊神。變化隨時。仁勇冠世。顯威靈之赫濯。錫以
王封。享俎豆之馨香。臚諸祀典。茲當乙巳。春雨愆期。入夏
以來。亢陽如故。有司牧之責者。莫不蒿目焦心。旁皇祈禱。
不啻一而再。再而三矣。乃雲有時而密。膏則屯之。雷有時
而聲。風則散之。麥秋屆而漸枯。石田嘆而懸耒。夫

國之所恃。唯民。民之所恃。唯歲。歲一不登。則饑饉流離。兒啼

婦泣。將塵

宸衷宵旰之憂及今尙可以補救也。鵠立代

天東巡於本月十七日回津道途所經見農民之望雨不啻饑者之望食渴者之思飲翹首跂足刻無容緩用是食不甘味寢不安席謹會同鎮道各官涓吉結壇匍匐神前爲民請命伏願處高聽卑垂慈渙澤膚寸合而神通丕顯時雨降而下土其蘇戶戶謳歌家家尸祝皆沐神惠於無盡矣。鵠立等不勝激切屏營之至謹疏。

天津祈雨疏二

巡鹽御史

莽鵠立

疏爲遵

旨禱雨事。伏以爲民請命。久懷呼籲之誠。待澤孔殷。彌切再三之
瀆。蓋雲霓之望。雖迫於人心。而霖雨之施。終須乎神力。洵
幽明之可感。望靈爽之式臨。是用誠求。再申虔禱。粵自今
春旱魃爲虐。春麥漸槁。秋田失望。鵠立代巡山左。曾經致
禱。未獲神佑。回津以後。觸景傷心。禱求彌迫。而屯膏如故。
自愧積誠未至。不足以仰格神明。憂心如焚。計無所出。不
得已而繕摺奏明。今奉

皇上俞旨。着實虔誠祈禱。欽此。臣特會同鎮臣徐仁。道臣段如蕙。
柯喬年等。再設醮壇。齋戒沐浴。謹卜五月朔日爲始。虔誠

步禱以仰副

皇上憂勤惕厲之衷。以代陳下土瞻望祈求之意。叩懇尊神大顯靈異。迅賜甘霖。則夏收雖減。秋穫可期。失今不救。將來一望石田。釀成荒歉。神寧無恫乎。爲此匍匐叩請。不勝激切屏營之至。謹疏。

謝雨疏

巡鹽御史

莽鵠立

伏以

天心博愛。大德曰生。神聽無私。有求必應。沛甘霖於原野。草木濡膏。遍時雨於田疇。麥麻生色。四郊雀躍。五內心銘。欽惟尊

神潛見隨時躍飛布澤大仁大勇靈異著乎坤維乃聖乃
神變化全乎乾德茲因亢旱用切祈求不揣惓衷荷蒙鑒
格雲旂靈黷頃刻而漫野蔽山雨陣滂沱瞬息而流川盈
澮槁者轉秀不啻春漲桃花樂以忘憂羣頌恩周蒲稷鵠
立等仰瞻靈顯俯被高深謝以疏陳感難言罄伏願百靈
効順四海同春萬載千秋佑金甌以永固五風十雨應玉
燭之長調鵠立等不勝感激懼謝之至謹疏

祈晴文

巡鹽御史
莽鵠立

維神靈之孔赫是民命之攸司凡兆民之疾苦與下吏焉

其之。茲霍霏之久。潦遍淹沒其耘耔。日沍霰而如注。室傾圯而塗泥。米則珠而薪桂。儼沉竈之無炊。嗟黔黎之何罪。慘目覩其難支。豈

天心之降割。填萬姓於溝渠。立等愧省躬之無術。致恒陰之淋漓。所自艾者。愆尤之有萬狀。而所可信者。神明之非不慈。惟龍王之軫恤。回風伯與雨師。留甘霖而徐沛。念昏墊之可悲。苟

帝怒之弗釋。願立躬以當之。凡愚氓之有咎。皆某職之多疵。謹精禋以拜禱。惟神力之轉移。爲億兆人而請命。何恤乎瑣瀆。

於神祇謹疏

環水樓記

巡鹽御史顧琮

雍正四年春正月琮奉

命赴天津協理鹽政夏五月始受事入署四面皆水也有樓焉蒞
任初未暇寓目案牘少清始登焉有舊題環水樓額蓋津
爲羣水所匯而使院在運河之壩西則充豫諸水入南運
河者滌其前迤北則諸淀之水會於北運河者遶其後皆
東南流至三岔河以合流而歸於海而茲樓適居其中央
余每徘徊其上東南滄海西北

神京極目四望則志氣爲之開張又或暝色入林羣動皆息
靜夜月明水天相逼掩卷默坐心神瑩然柳子厚有言君
子之爲政也必有游息之物高明之具使之清寧平夷恒
若有餘然後理達而事成蓋鏡之鑑也惟無物故能鑑物
人心亦然惟無事故能應事方其無事寂然不動若水之
止澄泓而可以鑑物也及其應事感而遂通若水之流橫
從倨句必循其理其萬折也必東故君子見夫水必觀焉
省身之密也遂書以自警以告後之君子是爲記

靜廉堂記

巡鹽御史顧琮

雍正癸丑仲秋余奉

命督理直隸河務方莅任卽巡視河防未遑居處至冬十有一月望後四日歸天津使院越三日友人傅文孫至自京携朱子所書靜廉二字石刻贈余余因以名堂夫靜與廉本乎性亦成於學者也靜者格物之源神凝而後幾可研所以能慮也廉者守身之要內澹而後外可潔所以不撓也石刻在鎮邑學宮歲久流落民間士人張某得之牆內移置其家而此刻復顯余生後朱子數百年得其書而額諸室如日侍先賢之側心常有警焉是以記之

重修天津府學明倫堂記

巡鹽御史 顧 琮

間考兩漢循吏以良二千石著聲者若文翁之於蜀李忠之於丹陽任延之於武威莫不以興起學校崇尚道德爲先事蓋以學不興則教不肅教不肅則化不治化不治則政不成欲政成而訟理俗茂而民和舍學校以爲教其道無由也後世司民牧者迫於催科視此爲不甚重輕之事將古所謂司徒六德六行六藝之教闕焉無聞於是士之入學者亦自安苟且而不復求進於忠信仁義之途政令之日弛風俗之不古若其不以此也歟天津舊屬衛地其

學廩建於前明正統中屢廢屢葺

國朝雍正間由衛升州由州升府學宮則仍其地不改第歲久勿治陳丹暗粉難爲觀美前守桂林李公撤而新之獨明倫堂舊址畚築不堅構櫺欹仆今太守程公以龔黃之治行出守是邦撫卹輿咻兆庶康悅期望則率其令長及郡學博士謁先師廟集諸生而訓迪之顧瞻斯堂將就傾圯慮無以爲宣化地也急割俸錢若干而益以廩膳羨貲諏日庀材凡楣楔楔枳桷桷采楹之屬或椽或堊百廢具興肇工於乾隆三年二月日告竣於五月日堂旣成諸生

謁子請記子謂是舉也用不濫材工不曠役施之而得所
先務不容以不文辭爰進諸生而語之曰

國家

列聖相承誕敷文教四海向風多士生近三輔含茹雅化幾百年
矣君臣父子夫婦昆弟朋友之大倫豈無有講明於夙昔
者乎登斯堂也則宜顧名思義臣勸於忠子勉於孝兄弟
夫婦朋友之間益相親而相遜如是則成德達材居爲良
士出爲純臣而於

朝廷陶鑄人材之典庶幾無負焉不然雖日遊於學俎豆僅

匱象勺干簫未嘗不備其器。鞀鼓柷敔。笙鏞琴瑟。未嘗不審其音。屈伸俯仰。盤踞綴兆。未嘗不嫻其度。而尊君親上之大義。不著不察。則郡之人士。何以是則而是。效三代盛王之治。亦何由復覩哉。衆皆曰。善。爰撫其本末。并推原賢守以經術爲治術之意。而鐫之於石。

重修天津護城河水閘記

錢陳羣

自古土功之興。有城必有池。所以限封疆。通宣蓄。資灌溉。利往來也。周公成洛邑。鑿陽渠。以周四面。而秦漢以來。千金五龍之號。富民利人之名。史不乏書。代著其烈。此亦見

水之爲利溥而廢興之間事甚鉅也天津爲九河下流於北地稱澤國城東北二面臨大河餘二面無水舊於城側開護城小河一道而於城東南角開水門一以引河水又於城下東西鑿水門二引水入城各立閘司啟閉康熙十三年因廢重修廣袤深淺不改其舊數十年來木朽石傾閘不能制水一時權宜槩行堵塞而護城河從此遂淤太守程公以清德令望來守此邦四國誦爲仁人

九重聞其長者綱舉目張百廢具理先是郡之士民以護城河閘請於前守李公甫營浚築旋奉

召以去。至是復請於公。公曰：是不可以不修。遂屬工興事。親督畚鍤。旬月而事竣。清流洋溢。左環右繞。儼乎金湯之固矣。且夫閘之設也。非美觀也。蓋有六利焉。畿南之水。泛溢無時。有閘則按期啟閉。近城左右。永無水患。其利一也。城內溝瀆之水。壅滯無歸。有閘則積水可流。積穢可泄。其利二也。斥鹵之地。素無甘井。居民飲食。皆遠汲河水。有閘則清泉日注。饔飧是資。其利三也。城南隙地。必藉清水灌溉。有閘則溝澮宣通。磽确之地。皆成肥壤。其利四也。居民夜作。例不禁火。曲突徙薪。備豫宜早。有閘則一旦失火。即可挽水。

以撲滅其利五也。有大河以繞其東北，有小河以環其西南。大河總其干，小河分其支，脈絡周通，土風清美。坐使形勝日尊，都邑日盛，其利六也。夫爲民興事，捐己有以開百年之利，賢大夫之事也。述舊章，修故典，垂茂績於來茲，廣前猷於不替，亦後世有民社者則也。爰爲之記，以爲來者法焉。

趙氏義產輸丁碑記

趙瑛

樂豫有言：葛藟猶能庇其根本，是故厚可爲也，薄不可爲也。矧薄我宗族乎哉！我趙氏始祖前明永樂時，來自南中。

占籍海墘爲竈戶。於武清縣趙家莊大小二處聚族而居
十有餘世。

本朝順治初年。我曾祖洪宇公徙居天津。逮我祖華亭公。我
父佐君公。三世相承。士農兼習。資產豐裕。務爲敦睦之行。
凡我族丁有長賦。或力不能措。悉代輸之。償與否固無論
也。自時厥後。雖椒聊繁衍。而門戶分析。素業亦已漸嗇。常
恐失德。起於乾餱。六行衰於任恤。繩武無聞。詎非貽厥之
羞乎。瑛無他藝能。不敢狃於嵒窳。而勤儉無失溫飽。俾子
弟輩佔畢家塾。循樸素之習。保堂構之基。誠爲厚幸。然皆

高曾以來餘慶之所貽也。念水木之本源。今之支分派別。雖與瑛遠近有差。自先人視之。則軫愛惟均。而瑛乃薄之。敢乎哉。通計族寵丁共二十三丁九分五釐五毫。既不能使貧乏者悉家給而人足。而勉吾力以紓其困。俾丁賦無一逋者。於今三年矣。然而拳拳之意。願始終爲之不啻三年也。又願吾子孫世世爲之不啻百年也。因置得小孫家莊一處。計房基園田地七十二畝四分四釐四毫。距大直沽先塋里許。佃戶十數家。每歲租銀三十五兩七錢三分。擇族中謹愿者。遞司出入。凡二十三丁之賦。皆取給焉。輸

將無悞安享太平之福其贏餘爲春秋祭掃之用合雲仍
飫餒餘盡歡而退歲以爲常亦可少申敦睦之忱矣自義
田旣設之後上其事於官案牘永存又勒之貞珉圖形炳
具子若孫必不敢據爲已有族人之心必不敢妄生覬覦
如有不肖協力攻之此一時之過慮料他日必有人加惠
宗支繼起而式廓焉瑛豈無厚望歟用是備書顛末布告
來茲以待我趙氏之亢宗者

包孝肅公廟碑

運使 倪象愷

轉運使始於李唐天寶後守是職者無論已宋代名臣如

陳恕鮮于侁呂公弼歐陽修唐介諸君子皆先後歷茲任。惟包公之名獨著。公諱拯字希仁。宋時由龍圖閣直學士出爲河北都轉運使。時公私充斥。競言財賦。公獨守祖宗法。不聞別有改創。利徧魚鹽。威懾戚貴。其所爲政。寓慈惠於剛毅之中。故至今士大夫猶想見其風。徽以相感。厲下至僕隸妾婦。以及牛童馬走。無不道其姓名。述其遺事。津津焉。且凜凜焉。若前日事者。此豈勢力智巧之所得爭。歲月寒暑之所能滅者哉。誠發於中而情見於外也。惜轉運惠政史闕略不傳。無考鏡。然公孝篤於親。忠結於主。關節

不到笑比河清。正直有爲之氣。其感於後世之人心者。尙耿耿不忘。則其措之當時者。必歷歷可信。然則公之政。雖不傳。而所以傳之者。至矣。昔召南詠歌。召伯之化。至愛及甘棠。而終不言其化之之道。韓昌黎刺潮州。至今民水旱疾疫必祝而蘇子瞻作廟碑。亦不縷書其政治。蓋有可指者。尙偏而不全。而至於無可指者。直久而愈篤。故聞聲知人。不言而喻。不然。公去今遠矣。旣未嘗親被其澤。又非求媚於神。而何以愛慕之。而俎豆之。焉。蒿悽愴。若或見之。其得於人如是哉。愷承乏長蘆。才弱力腐。望古生愧。滄州運

判史君尙廉分職二載恤商體竈有公之心因宋轉運聽
事舊地新公祠宇以光薦祀以答人心前官保孫公今制
府高公鹽政三公直以繩人廉以澤物諸所設施與公合
轍於是允其所請屬愷酌量經理商竈士民鼓舞趨事匝
月落成延主持奉香火有司春秋祭享史君請記於余因
書其事於石嗟乎轉運一官古來衆矣且其人皆賢而有
爲者而公獨廟食茲土數百年馨香如一日且可期於無
窮我於以知公之德澤之深且遠更以見直道之公爲不
隔於三代也

重修儒學碑記

巡使 盧見曾

自古建學者必於國之陽塏爽之地宅高勢崇使瞻而知尊治財用物使久而恒固潔其堂皇使禮行而肅廣其舍宇使事集而備時其繕完望焉而若新盛其鼓舞興焉而不倦非是無以宏聖道成教化也我

朝尊師右文典禮隆備追崇

先聖五代之祀釐正從祀諸儒建書院加特科廣博士弟子員額九州俎豆之區罔不承流向風以仰副德意天津於

神京爲左輔東距大海洋船鹽筴百貨之所輻輳又自明以

來爲軍衛之地。其改爲州治。因而陞府。幾三十年。人心風俗之漸染於功利。猶有未克不變者。所以崇奉學宮。習祭菜。鼓篋之儀。以播絃誦之雅化。視他郡尤爲亟。政理之要。莫有先焉。歲辛未。余遷長蘆運使。始至釋奠。仰瞻殿壁。彫剝門廡。欹斜。櫺星門內外。水渚而蘆茂。席板以渡。迺得進。而瞻禮。頽垣通市。完者亦卑不及肩。爲慨然太息者久之。謀修建於臺使者高公恒。公曰。吾志也。按察司副使董君承勲。知府熊君繹祖。聞之交贊其事。迺簡官師之能受功者。率作興役。疏其水而去之。使無復淤。薙其草而絕之。使

無復苗垣宇所設。增其庀。植其傾。木石所施。汰其朽。任其壯。滌之聖之。丹之護之。自堂徂基。周內及外。凡學所宜具者。靡不畢舉。於是枚枚翼翼。瞻者赫然。知學宮之尊而仰聖教之大。且將使津之士。因是興起。以臻乎日新之盛。而復推其餘。以及里巷鄉曲之間。皆知慕文學而敦禮讓。夫固予所旦夕期之者已。是役也。經始於乾隆辛未七月。其落成則以十月庚子。凡八十五日而畢工。計財用之費爲金一千一百有奇云。抑考天津於明之正統始建學宮。歷景泰至崇禎二年而修者五我。

朝自順治十年。至康熙四十七年。而修者四。雍正九年陞州爲府。十一年。知府李君梅賓修建府縣兩學。迄今甫十八年。而修者三。是何後之修者。若是其亟歟。余維津爲水鄉。水不治則壅。壅則地潰。官之垣墉屋舍。因以頽圯。官斯土者。苟其以時疏濬而葺治之。於以敦行典禮。崇獎儒術。輔成

聖天子覃敷文教之盛。而毋視爲緩圖。斯則余之所臨文興歎而不能無望於後之人者也。

問津書院碑記

運使
盧見曾

世宗皇帝御宇。飭天下省會各立書院。蓋緣教授等官。部選拘於年例。不必盡賢。且文又弟子員散處。無由朝夕相見。一一端其德行而課其材藝。乃於學官庠校之外。別建一肄業之所。禮聘名儒。掌其教。拔庠士之尤秀者。資以膏火之費。使朝夕與居。以授經而講藝焉。其爲興德育才計。至深遠也。嗣是郡縣有司承

上意。旨通都大邑。往往設有書院。士習蒸蒸。進而益上。天津以百川朝宗之地。而爲京師左輔。感化最先。輜軒採風者之所首及。顧闕焉未興。余竊病之前太平府通判查君爲義告

余曰家有廢宅在運署之西南隅其地高阜而面陽形家以爲利建學盍筮之筮從白之總督方公觀承署鹽院高公恒均報可爰庀材鳩工位其中爲講堂堂三間前爲門後爲山長書室而環之以學舍凡六十有四間計費白金二千四百有奇經始於乾隆十六年辛未八月落成於十七年壬申二月適吉公慶來視鹽政爲延名師立教條入學鼓篋宵雅肄三賓譙禮成容止有秩越翼日諸生踵門謁請所以名是書院者爰進而詔之曰若濱海亦知夫海乎孔子之道猶海也學者蘄至乎道而止今之制義其津

筏也學者因文見道。譬如汎海者正趨鼓楫候勁風揭百尺維長綃挂帆席然後望濤遠決乘蹻絕往以徐臻乎員嶠方壺蓬島之勝。若自厓而返與終身於斷港絕潢而不能達者皆不得其津者也。余姑導使問焉毋致眩惑於沙汭之雲錦遊忤於暫曉之蜩像則庶乎其不迷於所往矣。諸生再拜曰有是哉夫子之詔我也敢不顧名思義以勉承教思於是伐石紀言述事所緣起而名之以問津云。

書倪節母王孺人行略後

進士 王又樸

余師方望溪先生退老金陵。余以職事謁上官至必就先

生先生詢余曰。天津亦有奇德異行足以傳者乎。余唯唯。未有以應也。及余謝老將歸。過邗溝。適有築堤之役。留泰而倪生錕自鄉來從余遊。書其嗣母王孺人之節行求余言以傳。余以孺人之守節撫孤。凡士夫家知禮義重廉恥者皆能之。况已奉

旌典。行實列禮官。將爲史館所採錄。而又何待余言以爲重乎。旣而錕言其母之居貧作苦。約已豐人。宜家及恤下諸事。并述其所以訓誡子孫之言與行狀。余始稍稍異之。旣又言其母之事祖姑。能得其心。命主家政有惠逮下。必曰

此太夫人意如某事某事皆其實蹟也。余不覺憬然動容。肅然起立而言曰。有是哉。此德盛禮恭聖賢之行詣。而乃得之於婦人女子乎。夫好行其德而樂居其名人情也。然且有攘美者。然且有嫉能者。彼非在衣冠禮樂中者耶。而然且如此。至於窮居間巷之士。欲砥行立名。恥其聲聞之不著。輒自炫奇標異。以求有聲勢者之援。則皆今日男子之行也。至於善則歸君。過則歸己。古純臣之義士大夫所不能爲。而孺人能之。方且風示天下。以爲具鬚眉者所愧恥而奮焉以興。而豈僅僅焉重閨閣而端女範而已乎。獨

惜余師已歿不及得其文以傳孺人也且余與倪氏交自祖孫父子三世矣孺人之賢如此而余不能知余之孽曠其可愧又何如也已

殷貞女哀辭

查禮

自古節烈之婦往往臨患難際幾獨以一死完其身若夫遇人不淑遭其凌暴雖志芳行潔不以爲德反以爲讎其遇尤可憫而其心之難白有百倍於患難幾獨者若天津貞女殷女可哀焉殷氏本貧家女幼失父惟兄母是依年十六嫁爲村民邢文貴妻文貴素無行其母趙氏以淫佚

聞初文貴娶于氏以貞慎故出之聞殷氏孤且美以計復
爲文貴娶之而殷氏堅貞逾于氏趙氏怒甚乃與文貴曰
加捶楚以沸湯沃之燔灼其體體盡潰爛郡守劉公知其
事委邑尉訊驗而氏絕口不言夫姑之惡且守禮甚篤欲
驗其創不可得未幾氏卒邑令張公歸自上谷躬爲推訊
盡得其情卽置趙氏文貴於法而氏之節始著是日傾城
往觀無不誦郡邑二公之廉明而慶殷氏之貞得以不朽
也余謂氏之遭遇爲人世之至不幸幸而郡邑二公爲之
表揚其事其亦可以無憾矣爰作辭以哀之辭曰

清且直兮。白河之流。高城巖巖兮。峙河之洲。有女食貧兮。
深源之裔。負郭而居兮。甘心疏糲。惟鳩媒之無良兮。棲鸞
翼於荆榛。播桑中之餘波兮。將貞者而胥淪。羌惟賣珠以
牽蘿兮。知市門之不可倚也。寧焦灼而焚如兮。亦何悔乎。
九死也行路爲之涕泣兮。鄰里爲之輟歡喜。父母之孔邇
兮。邑魯恭而郡袁安。嗟守禮之獨嚴兮。媿呈身而識面。蓼
食辛而自知兮。忍中蒿之外。煽魂冥冥而長逝兮。從嫠女
與靈妃。雖膚髮之毀傷兮。完禮義而全歸。嗟輕塵之棲草
兮。誰抱貞於空谷。植污泥而不染兮。宛青蓮之馥郁。豈荒

邱而憑弔兮。慨葬玉之深深。聊陳辭於遺躅兮。庶千載之下得以識匪石之良心。

重修長蘆公所碑記

運同 孟 淦

使署西北隅有長蘆公所焉。創始康熙十三年。乾隆五年踵修之。前使倪公詳其顛末而勒諸石。所謂虛謀集益之義也。迄今四十餘載。相沿既久。頽圯殆盡。而未嘗有過而問焉者。壬寅夏。我運憲張公。

簡命蘆峯使事。甫駐節。省情形。按虛實。準情酌理。仍利祛弊。靡不至當。爲之歎曰。商力衰而人心渙。卽公所而大略可覩矣。

於是指陳利弊愷切詳明我督憲鄭奏聞

廷陛旋蒙

特恩加價自是困者復甦歡騰載路咸曰將何以答

聖恩而酬憲德也惟有同心協力俾嵯務公私歸於萬全亟宜率
由舊章復厥成規遂以修葺公所請使者曰善爲申院憲
如所請蘆商踴躍捐資庀材經始不月餘而落成余嘗過
之見夫濟濟公庭井然煥然卽所謂虛謀集益之義也嗚
呼仁政入人之深移人之速顧若是歟雖然靡不有初鮮
克有終後之視今安知不猶今之視昔吾願諸商謀於斯

議於斯棲風雨於斯永矢公心久而勿替無忘

聖天子有加無已之洪恩賢使者惠愛長蘆之至意也是爲記

義塚碑記

運使 張棟

蓋聞人死曰鬼鬼歸也終死之事曰葬葬藏也葬以藏斯
鬼有歸也停棺而不葬鬼無歸矣生者安乎曰不安然則
其忍而爲此者也曰無地也無力也無地無可葬無力弗
能葬也停棺其非得已也嗟乎此陋俗之所以相沿而官
斯土者之所弗忍覩也天津地濱海又介衛潞合流之衝
形勢窪下每當盛夏大雨時行地多積水凡居民之貧不

能葬者。往往飄零淹沒。見者心傷。余承乏茲土。欲擇地爲置義塚。而難其經理之人。適錢君蔭南。程君璣。與余有同志。遂各捐廉俸爲衆倡。衆亦樂輸以應。舉凡經營建置。溝防封樹之事。皆屬二君任其勞。其地在津之西南隅。截長補短爲頃一。爲畝二十。並於塚旁構造數楹。備掩埋之具。設典守之人。經始於乾隆甲辰三月。迄七月而規畫乃定。先是有郡人李氏捐地十數畝。周圍鑿坑。里中有倒斃無主之屍。悉葬焉。號掩骨會。其地與今塚毗連。而費出募輸。常虞不繼。今從錢君請。總兩處籌之。每年於商捐公項內。

動給銀一百六十八兩。源源支用。以專司事之責。成免募輸之紛擾。誠長策也。夫既有掩骨之墳。又設埋棺之塚。其爲地已寬。且所需者一抔之土。所費者一舉之勞。其爲力亦易。地寬而力易。而猶以陋俗相安。忍令死者飄零淹浸。爲無歸之鬼也。民雖貧。必不然矣。事旣藏。特立檔案於官。以儲經費。而備稽覈。其必於官者。何亦曰。此非徒衆人之爲而固。

聖天子仁育萬民。澤及枯骨之至意。所爲推廣於萬一者也。庶其行之可久乎。顧余今以憂去。而二君居官稱職。又將不次

而去。所冀後之經理茲事者。勉思所以繼之也。爰敘其顛末。而書諸石。凡供是役者。均載焉。

詩

朗吟樓

王公弼

仙人黃鶴舞婆娑。飲吸長鯨醉踏歌。乾坤何處著雙眼。乘
風偶爾來滄波。滄波江上看明月。劍星夜半寒光發。飛劍
長空落鴻影。斷蛟剗兕戲溟渤。爲問靈砂果可傳。願借仙
人丹九還。仙人得道寸心裏。點石恐誤三千年。瓊臺紫府
尋洞宅。好此樓居高百尺。大笑不知宇宙寬。伸臥尙嫌天
地窄。黃公壚畔酒如泉。朗吟樓下多漁船。烹鮮浮白醉神
仙。醉後詩狂欲上天。上天下地何所有。醉夢醒時仍問酒。

閒來樓上對仙跡。仙乎仙乎吾與友。

朗吟樓呂祖祠

王公弼

丹梯插碧枕河流。可是仙人居好樓。雲駐乍疑蓬島近。月明還憶楚江秋。洞庭西放雙鳬去。滄海今隨一劍遊。夜靜波澄聽唳鶴。醉驚珠斗豁吟眸。

驄馬行送任御史

珙

視鹺長蘆

朱彝尊

春明門東驄馬嘶。笑官新鑿碧玉蹄。紫茸鞞鞘錦障泥。使者衣繡行長隄。寒花露草烟淒淒。千樹萬樹楊柳低。津門此去三百里。來朝定指西沽西。長蘆鹽筴通青齊。君今乘

驄按左海。章綬不殊。還會稽。我歌驄馬行。君騎驄馬去。明年策馬來春明。應記今朝送行處。

過滄州

王士正

春草千里合。春波兩岸生。迢迢新柳色。碧過卅分城。

登津門稽古寺閣

高爾修

歲餘積雪苦凝寒。閒步登臨古寺闌。百雉金城窗外峙。一灣漕水坐中看。東浮烟霧蜃樓市。北起風沙燕塞巒。乘興欲窮千里目。

帝京遙在五雲端。

天津夜泊

周綸

搖落悲秋擬問天。夜鐘岑寂纔行船。銀河無路看垂盡。壁
月長空照自圓。京洛弟兄憑短札。鄉園風物憶殘年。津河
一綫通瀛海。遮莫仙山隔暮烟。

無棣城

胡惟一

無棣荒城何處尋。兒童指引到河陰。霸圖無改山川舊。劫
火俄驚草樹深。點點寒鴉歸暮堞。行行野鷺起秋霖。人間
多少繁華夢。瘦馬斜陽太不禁。

天津關用薛文清舊韻

查慎行

地勢東來一掌平。忽開官閣起崢嶸。風腥曉市知魚賤。客
過嚴關喜篋輕。暮雨暗添丁字水。春陰低壓直沽城。雲帆
轉海非難事。誰念東南物力傾。

桃花寺

查慎行

已過桃花口。再問桃花寺。獨客叩門來。老僧方坐睡。欲知
春淺深。但看花開未。

舟次天津

曹鑑平

春月辭家出津門。入夏過從知燕市。近還見海雲多萬堞。
臨高阜。千帆蕩濁河。幾回哀雁度鄉思。更如何。

海光寺新河開成賦老泉水官詩韻

僧成衡

殿堂闢草莽鐘鼓集人天。鑿渠三百丈疊橋并駕船。船以
泛巨浸橋以俯澄淵。毒龍已弗制况彼鼉與鼃。潮音雜梵
音貝葉香風翻浪花涌天花天女來雙鬟殷勤瞻古佛。獅
象擁青蓮安排成北海還往多南蠻朝霞映晴波似旛還
似旛半輪浸微汐如梳復如卷或來戴山鰲或潛橫海鱣
水清竿莫釣浪濶罾難振居民類蜚戶過客比輞川。藜蘆
隱漁唱高柳颺炊烟斜陽一徙倚風物儼鄉關。

宸章大小賜巷曲長短編斯河自千古。

天子同萬年。孰云九鼎重。巨力擎不難。馬駒大樹蔭。歸宗一味禪。
後來其我知。努力圖光前。

之葛沽舟中雜詩四首

吳雯

曉日龍嵒近。直沽遙遙帆影出。平蕪眼前芳草衡湘色。只
少春山叫鷓鴣。

雲母窻開水上樓。依依楊柳拂行舟。無端載酒彈箏過。都
捲珠簾看不休。

短蒲沙帶退潮痕。花裏樓臺柳外村。暫歇吹簫倚雙槳。閒
看絲網摘河豚。

海畔人家沙上居。長河東下又分渠。紛紛曬網斜陽裏。可有仙人孫賣魚。

觀海

吳雯

始識朝宗大。登臺覲廣洋。乾坤成瀕洞。風雨失尋常。日照扶桑小。雲流太古荒。蛟龍通窟宅。魚鰲沒橋梁。一氣元精合。千帆島嶼長。飛仙如可接。鶴馭轉茫茫。

望津門晚烟

張坦

津門衍平疇。騁目數千里。落景延殘城。晴光碧於洗。一葉無端倪。灑然塵慮委。微風不滿林。波痕彌清泚。墟烟藹藹

生萬縷散如綺。樓臺隱嵒歷掩映遙峰紫。瑤室吐火珠。金
光浮兩溪。溪樹凜參差。青蒼蒹葭倚。水天不復辨。元氣混
茫裏。遠觀崑崙霞。蒸蒸照赤水。近覲泰山雲。觸石膚寸起。
素練雜紅綃。兩兩差可擬。烟光亦恒景。燦爛無如此。或云
近海天。沉瀟遙相被。或云近丹闕。光輝騰瀾瀾。大造本自
然。具勝在物理。遐矚當暝時。轉與朝嵐似。漸窺天鏡明。咫
尺銀漢指。彷彿紫光中。飄飄來仙子。有志在凌烟。輕身騎
赤鯉。

發天津

張坦

駿馬隄邊路。征衣拂曉晴。寒雲澄海浪。殘雪凍沙城。連袂
皆同調。辭親暫遠行。遙知吳地草。旦晚發春榮。

寄題臨津樓

儲在文

高樓迢遞俯河濱。檻外浮雲自古今。齊履舊傳無棣遠。禹
功惟見鬲津深。風生畫棟歸寒浦。烟滿璇題接暮林。何日
披襟攜綠玉。月明陂上動清吟。

卬兮城

運司張 璪

童子採藥來。相將凌扶桑。徐福誕妄流。大言欺秦皇。至今
卬兮城。秋草填斜陽。

釣魚臺

張璪

昔時垂釣叟。避居東海湄。就養盡歸來。遂爲王者師。始知周家業。九鼎懸一絲。

朗吟樓

張璪

仙人亦賦詩。仙人亦飲酒。詩酒卽仙人。仙人何處有。三過朗吟樓。獨立空搔首。

馬跑泉

張璪

泉本地中行。偶爲馬所得。名以馬跑泉。示以別鹵斤。勺罷味餘甘。勿筮泥不食。

題院署後繹志軒

傅維祖

鵬翎迅疾乍離弦。電閃星流堪洞堅。曾制驕猿號樹裏。更教飛雁落雲邊。道惟用直應無阻。志在持平自不偏。物理細參公意在。肯將如矢讓前賢。

九日奉陪莽大延尉環水樓登高

傅維祖

半醉黃花酒。同登環水樓。波光足下轉。帆影檻前浮。西北神京壯。東南海氣秋。清颼吹兩袖。開府自風流。

題香林院

傅維祖

小春天氣暖。行飯到香林。流水西來合。瀛波南望深。樹凋

歸夢境猿靜習禪心暫對黃冠坐喜無塵事侵

登環水樓

魯之裕

鎖鑰津門柏府雄牙旗秋漾碧波中河通大海聲彌壯人
上層樓眼愈空跋浪鯨鯢歡得雨濟川舟楫快乘風

堯天猶自憂昏墊倚檻誰思度土功

題莽大廷尉院署記後

魯之裕

莽公今純臣明志以澹泊歷官中外間左右一無攬

天子命巡蘆以公執事恪蘆固鹺鹵區官解易傾削僉云弗美觀
議宜金與獲公曰奚爲哉陋卑吾所樂聽事視事耳安在

事丹堊爾商爾竈僦比年孰不瘼露處紛有人吾何宴阿
閣食則屏肥甘器則安鹽惡惟期廣萬間大庇茲羸弱維
春公出巡羣情競荒度不日攻之成公歸視而愕輒欲示
後人此記所由作仁哉我公心恤商至此若夫人惟弗仁
奉身斯不約奉約而心仁詎至于民虐予交公也深予知
公也灼爲公作好歌以昭其大畧寄語後來官勿復恣恢
拓

題環水樓

沈儼

百尺烏臺俯碧湍登臨每向靜中看怒濤聲震疑排闥駭

浪花飛欲繞。闌地近滄溟。思煮海時逢。熙皞慶安瀾。波臣
退舍皆膏壤。一望平疇眼界寬。

題莽大廷尉院署記後

沈儼

我公崇節儉。一解做官邪。輪奐何須美。蓬茅亦可家。衆工
趨葺治。公意懼浮誇。物力皆當惜。人情務去奢。理鹺商自
裕。聽政吏無譁。衛

國心彌切。謀身志肯賒。繕垣思保障。敷土護堤沙。涸魴沾波
潤。哀鴻絕怨嗟。臣心真似水。

帝眷乃無涯。作法示來者。相期戒踵華。

題莽大廷尉院署記後

錢陳羣

公乎真愛商視商如赤子。鎮解枕河濱數椽仍湫庖。公笑而安焉。曰豈商之使自有利公者多欲藏于已。往往量移時。并攜及床第。上好下必甚。其事良可鄙。我今奉

命來詎可蹈舊軌。由來純臣心。澄白淨如水。一錢不欲名。以力挽頽靡。商衆感此意。頗厭纂組侈。先公而後私。了不煩笞箠。伺公視東郡。農事猶未起。鳩材繕公署。稍稍臻合美。公顧而安焉。豈曰我之使。乃今旣輪奐。我盍其紀此。俾後之來者。可考而知矣。洎乎役將滿。故事易巡視。

帝曰谷汝來其無以易汝錫汝車服庸晉汝總廷李公益早夜思
所以稱

明旨今年暑雨愆廬舍多傾圯尾閭不停洩積水望瀾瀾負襁無
寧居豈惟失耘耔公設黔敖粥赴者百餘里劑盈而酌虛
治道得至理我適奉母歸扁舟十日艤採風書其事庶幾
珥筆史願公恢廣厦煦覆同衣被鈞樞運心衡位望高百
揆詣公政事廳僅容旋馬止

夏日遊水西園次海昌師相原韻

錢陳羣

長河北下獨當門
答省先生署作園
此日停車逢夏五年

時繫艇正黃昏閒情未要鳴騶近小坐惟聞乳雀喧最愛
公餘成往復藥欄曲徑一開樽

將去心情欲少留海天景物望中收百年那得千場會一
飲真當三日休桃李無言成過眼水雲有約話從頭舊遊
緩步尋詩地歷歷猶能記某邱

題莽大廷尉院署記後

查奕楠

惠澤清操起涸鱗坐令商竈盡迴春數椽詎足酬公德物
力猶煩詔後人

精純已釋身家念去住奚分人我爲願假鹽梅劑天下萬

間廣庇識無私。

正月九日過海光寺

胡捷

春郊策馬日初遲，正是沙平草淺時。
澗道猶聞冰瑟瑟，溪頭已見柳絲絲。
談元入坐翻新偈，憶往登樓檢舊詩。
紅鶴白松成寂寞，海天寥濶動相思。

九日登稽古寺閣

沈起麟

拾級登危閣，攬衣緩步行。
驟驚飛雁近，恍覺暮雲平。
屋瓦如鱗次，河流似練明。
試聽簷鐸振，空外忽傳聲。

天津

章琦

海氣忽吞城。潮來破浪行。到門舟上下。繞軸水縱橫。天意歸秋色。鄉心隔雁聲。載歌欵乃曲。別浦暮烟生。

鹽關夜歸

運使 蔣 林

高城月出四天寒。樓閣如霞望裏丹。籠燭不須迎馬首。簾燈早已夾河干。魚鱗屋比千家小。雁翅船連十里寬。

聖代卽今徭賦薄。津頭誰信客程難。

冬日過海光寺

佟 鉉

斜逕紆徐指梵宮。板橋村落畫難同。微冰凍積溪頭雪。枯樹狂號野外風。十里籃輿冬日暖。孤城蕭寺海天空。到來

爲覓湯休話。人在茶烟牕影中。

天津晚眺

巡鹽御史 余 縉

秋原鳴絡緯。落日照黃花。渡口喧津樹。漁舟動遠沙。草深常鬪鵲。簷際尙留瓜。河渚中流隱。孤城雨後斜。田家三四媪。負子話桑麻。

觀滄海日出歌

李之嶧

曾陟虞山之峯。維摩寺中有楚僧。好談異咫尺。蓬山一島孤。幻影驚看曉日出。又聞岱宗絕頂之東巘。扶桑夜半已堪辨。撼波一抹海天孤。倏爾明霞奇難篆。年來屏居滄海

曲竹雨松風隨斷續披露坐玩玉繩明
棋牖臥酣羲輪旭
懶軀無匹亦無醫食貧有道差免辱
喜隨驄馬侍御踪更
追花磚學士躡地平競頌海無波
天成欣覩燭調玉九歌
勿壞六府修臣力當竭臣心驚
荒度經年溟海濱衝泥揭
冰隨鴻鵠一朝信徧海上村
海風吹我爽如浴南瞰卬兮
城徐福一去燐火走青北望麻姑臺
方平何處雪浪成堆
吁嗟乎秦始皇漢武帝英雄天子氣
蓋世經國不知稼穡
艱海上求仙究何濟我

皇御世陟禹迹殫力溝洫諮碩畫
夢卜良弼度有人多士雲蒸爭

奮翮霄塗不識微躬勞探奇子夜來沙磧蛤蜊灘潔如雪
風潮音迅若決遠星歷歷互明滅此時漢影正西垂此時
蛟舞鼉猶咽漚鳥互驚飛且鳴東來一炬紅勝血橫如大
火流莫追升如立電光盪掣蒼龍閃目熬燥晴象緯笑指
啟明微須臾巨浪如擁銀又疑玉塔影倒揭琉璃世界水
晶宮月晦見月真奇絕天光欲曙海氣寒黑雲匝布如屏
列微茫漸覺星光疎絳霧頓開綺霞撤萬頃金波擁金輪
燎原共驚光焰烈轉瞬一躍尺五天蓮花猶燦暘谷穴誰
遣巨靈擘乾坤陰陽互根萬象陳

堯舜當宁化理醇。耕鑿千村作復息。梯航萬里尊且親。無分南北
東西四海秀頑老稚貴與賤。同是葵傾就日人。

登朗吟樓

樊世翼

岡巒體勢聳河滸。三輔探勝此樓古。拱之以日扇以風。會
駐雲輶留仙語。慨想終南學道年。白石青松冷伴眠。絳闕
元關通上下。氤氲呼吸注丹田。劍光如水復如雪。羽衣縹
緲隨明滅。吟殘皓月和清風。數聲清籟九霄徹。乍似龍吟
出深潭。還如鳳叫破烟嵐。劉琨孫登今縱在。塞上蘇門詎
可參。帆影悠悠流夕照。驚鷗駭鷺隨飛棹。滄波不盡滾滾

來猶似聲聲學長嘯。贏得人間一日閒。藤杖芒屨任往還。
獨對遺蹤思古調。宮商長繞畫梁間。

天后宮

于廷獻

驅使封家十八姨。龍洋鯨浪坦如夷。三津宮殿同瞻仰。萬
里帆檣盡指迷。彩蝶祗今來海舶。神鴉終古拂靈旗。
聖朝重譯爭修貢。呵護傳聞事更奇。

過西沽戍臺

胡忠楨

客路蒼茫外。殘陽隱堞樓。崇基接大野。孤影鎮長流。海氣
蛟龍靖。人烟草樹稠。太平無戍角。牧笛入清秋。

三水中分

天津知縣
張志奇

風帆葉葉下津門。亂水縱橫海氣昏。合處那從辨源委。分
流終自見清渾。

七臺環向

張志奇

畿輔巖疆有駐師。七臺基布自屢屨。時清無復驚烽火。盡
日靈風捲畫旗。

溟波浴日

張志奇

海門東望拱

神京萬里鯨波靜不驚。極浦方看騰紫氣。樹頭倏已挂金鉦。

洋艘駢津

張志奇

一水淼茫浪拍天吳儂書舫蜚人船。

聖朝何意通蠻貨自爲觀光近日邊。

浮梁馳渡

張志奇

萬國輪蹄盡此經。方舟鐵鎖壯金城。澤梁無禁行人歇。開
聽關門鼓角聲。

廣廈舟屯

張志奇

亭亭依岸艤

龍舸碧瓦參差照綠波。

玉輦不來春樹長遊鱗爭比舊時多。

南原樵影

張志奇

城中駕瓦碧粼粼極目平原遠市塵古徑寒林樵擔出分
明摩詰畫中人。

西淀漁歌

張志奇

瀾漫野水集漁舟網得金鱗發棹謳斜日微風吹過岸一
聲聲出白蘋洲。

過慶國寺

萬光泰

去海無百里河流何滔滔午風旣云息晚潮亦已高精藍

濱水溪訪古恣搜撈。山僧不解事。斷石填牆潦。呼羣曳碑
出。春蚓迷秋毫。聳牙交口讀。汨泥澄泉淘。嗟嗟古遺籍。幾
輩埋蓬蒿。唐宗昔雄武。跨海橫征艘。詩係唐太宗征高麗
回息士處俗名挂甲
寺。青萊沸雷鼓。平壤鳴霜刀。幸也得勝返。虎旅辭伏敬。不
然亡隋續。世事紛牛毛。

國家耀文德。箭箠弓亦棄。不縣魚門冑。寧試楚練袍。寄語太平
民。無棄耕桑勞。

節烈四婦歌

有序

查禮

天津舊有三婦合葬焉。一爲譚某妻陳氏。一爲阮某妻

諸氏以烈死一爲趙某妻裴氏以節死乾隆元年八月十八日金振妻丁氏無子視夫含殮畢旋殉柩側里人請諸當事與三節烈合葬稱節烈四婦云

君不見文文山作正氣歌津城節烈何其多父老向予說三婦往往涕泗爲滂沱二婦不受彊暴污秉貞浩氣還太和一婦食貧甘苦荼冰心鐵骨玉爲質不羨膏粱華腴珍羞羅凡此棱棱不可屈堪比蘇卿持節牧羊坡三豕纍纍一抔土丈二碑碣字不磨碧天霜月何皎潔羞照人間含羞妖冶嬌翠娥聞風興起金氏婦夫歿無子奈少何照見

古井水不波。泉路匪遙矢。靡他里巷聞之。各酸鼻。莫不心
欽足頓手摩挲。嗚呼。從來烈節。天所鑒。公道在人相護呵。
今茲四婦合爲一。各行其志同香窩。

聖世采風重節義。表厥宅里樹婆娑。豈無鬚眉愧柔骨。高風松
柏同巍峩。

望海寺

查禮

殿角瞳矐寒日明。憑高迢遞見蓬瀛。河分九派門前合。潮
送三山檻外迎。煙靄有時浮剎影。霜天無際徹鐘聲。回瞻

宸翰光華著。長使波濤晝夜平。

中元登海光寺樓寫望賦得八庚

查禮

暑退涼初至。登樓客思清。魚簾橋外密。稻隴寺前平。雲起連潮色。風過帶磬聲。佛香吹不斷。斜日射孤城。

渡子牙河

河西岸卽太公祠

查禮

逝者如斯晝夜流。蒼茫百里向滄洲。渭濱無復西周土。父老翻思北海儔。籠岸煙寒鮭菜艇。沈波月墮釣璜鉤。舟人指點崇祠在。不獨千秋姓氏留。

西沽晚歸二首

查禮

西沽水冷野風疎。艇載茶煙并束書。斜日半林秋柳外。荻

花深處賣鱸魚

石橋西畔斷霞浮。豆子航邊晚市收。獨坐船頭看雁過。數聲啼破海門秋。

正月十日海光寺放魚用東坡西湖放魚韻

查禮

冰底拾魚如拾塊。隔冰鞭水如鞭背。冰開水活魚拔泥。一道渾流橫似帶。野翁殄物恣朶頤。便擬攜歸充斫脍。可憐鬣損尾俱紅。更惜鱗殘首竝碎。呼童鬻取全其生。脫命庖厨入淵瀨。駭鹿仍歸豐草間。羈禽重出雕籠外。雪消南郭

閒相逐舊事西湖偶成會。漁人曬網趁斜陽。月吐寒光照
東海。

文中子墓

有序

王又樸

墓在靜海縣河西南。舊東城縣之崇德鄉。俗名崇先者
也。相傳父老清明日澆奠墓所。然覓絲燕麥動搖春風
而馬鬣不可復識矣。歲丁亥。耕農土中得斷碑。復誌其
墓。有金生者增築之。遂歸然成墳。余小試過此拜墓下。
求讀其碑。已半剝落。有慨乎中。賦以弔之。

先生卜地是何年。此日聞聲拜墓前。古穴蟻封衰草下。黃

昏鴉噪白楊邊。斷碑猶識千秋事。野老還焚一陌錢。大德由來堪不朽。肯教埋沒在風烟。

三岔河口

王又樸

千里長河盡。人傳是海門。地當平處拆。水統衆流尊。立浪魚龍怒。奔潮星斗翻。憑凌常落魄。何處覓真源。

書張孝婦傳略後

周焯

不惜冰肌療病身。鸞刀引處感蒼旻。世人莫謾訾愚孝。有智何曾益爾親。

延師無力痛翁貧。中壺居然絳帳陳。今日小郎談舊事。辨

香猶祝解圍人。

沈貞女詩八章

周焯

幽閒季女。行賦于歸。翩翩比翼。未偶分飛。
修短匪人。允由天造。既奪我儀。胡不我告。
所天惟一。秉心無貳。敬達雙親。俯鑒我志。
兄弟不知。曰恐身殉。厥志未完。敢蹈白刃。
詰朝卜吉。往之夫家。謝彼羅綺。易爾衰麻。
入室悲摧。隣里心惻。仰見姑嫜。截然飲泣。
飲泣云何。痛觸姑感。子職未終。聊代我特。

心結青松行契蒼昊季女幽閒守貞以老

孝子辭五章爲張紫垣作

周焯

事驚人符常理銀管書之空前史伊何人張孝子

母病劇盧扁窮綿延三百六十日夜夜禱蒼穹

顧帝已祈佛靈書貝葉捐血零藏之藏經閣後世傳爲孝子經

哀哀母病膏肓中叩天叩佛兩俱空孝子苦無計直欲身從

母既殂名何用門前坊愈高孝子心彌痛

弔殷貞女二首

周焯

貞女天津人。適同里邢某。邢母素有穢行。百計誨女淫。
不從。遂沃以沸湯。身無完膚。太守劉公聞其事。遣尉詰
之。貞女終不言。閱數日死。

一室薰蕕品。自分趨風狂。犬謾狺狺。清水肯受蒼蠅點。貞
玉從教灼火焚。冤可大伸終欲茹。肌雖全腐亦常芬。衛安
門外添抔土。自此人呼五烈墳。天津西門外舊有四烈墳。貞女葬其傍。

百計摧蘭不忍聞。終能皦皦出塵氛。男兒幾箇甘湯鑊。奇
節何關飲典墳。事雪已消通邑憤。傳成爭讀使君文。須知

法網從來大不肯窮搜狐鹿羣

觀海

周焯

百里家隣海。乘閒此一遊。茫無觀水術。陡起望洋愁。積浪千重霧。遙帆數點鷗。二山渺何許。我欲問浮邱。

冒雪遊海光寺

余懋檣

同雲籠四野。出郭度荒塍。獵馬遙衝雪。潛魚冷鑿冰。烟深不見寺。橋盡恰逢僧。我欲窺瀛海。危樓且獨登。

輓貞婦殷氏

張晉生

君不見百尺樓中身一擲。又不見望夫山頭化爲石。從來

貞節亦有人殷氏心跡光竹帛命不逢辰自幼孤秉性端
莊家清白結褵誤中媒氏賺姑趙淫穢苦促迫里巷憤懣
氣不平作爲歌謠傳街陌太守劉公素精明遴員委婉核
其真絕口不言夫姑惡含冤隱忍屈莫伸弱質村閨正氣
存不愛繁華便貪生折磨縱苦身何玷矢志靡他命亦輕
越日身死畢此志舍生取義邁等倫十七春光隨逝水魂
依杜宇潛悲辛賴有賢明張明府秦鏡高懸盡得情觀者
如堵其稱快從今草木亦知名天平蒼蒼日月黃如何私
照激烈儼凜若冰霜潔如雪特申大義明綱常昔年殉節

慕衣冠。今日完名巾幘香。噫人生百歲皆有死。此婦獨與
天地相久長。

春早渡西沽浮橋卽目偶成

天津道

張坦熊

農事方興作。鳴騶出郭聯。馬蹄波影上。人語曙光前。簞笠
東菑雨。簑笠西浦烟。太平原有象。休說長官賢。

張節婦輓詞

黃謙

娟娟弱質。入門而墜。新篁有節。古井無波。

天津賑恤行

博爾和

乾隆二年夏之半。時雨稍違。

聖憂旱捐租

鳳詔頻下頒復籌賑恤勤

宵旰欲溥甘霖潤枯槁敬宿齋宮誠致禱宮懸雅奏撤咸英大官
御膳辭珍好七省軍儲飛轉舳截散

元庾百萬斛喜氣歡聲宇宙盈大地生民全比屋入秋汎水溢河

流更

頒府藏修村塾巷戶堅完金有糧荒年更比豐年足小臣奉

命出京師監理漕儲適覩之不知普遍承

恩者此生何以報無私

丁巳秋夜天津防汛與全事勘工

武啟圖

行行相與到津頭。兩岸垂楊映水浮。暑色漸消開靜境。河源可探定同遊。一時清氣通閭闔。永夜精誠貫斗牛。歲月不妨隨俯仰。冰輪先照海天悠。

戊午夏秋霖雨河洶四溢津門地當下衝受淹偏重與丁

巳秋澇相埒爰誌憫災四章

天津知縣 朱奎揚

利盡魚鹽說水鄉。力田何事每逢荒。漏天十日懸蛟室。破峽千尋瀉呂梁。未雨拙謀殘隔戶。逾年驚覩兩滄桑。金穰火旱原無據。莫漫踟躕問彼蒼。

非緣萬壑未安流。南北爭趨滙下游。是處窪田同仰釜。去年陸地早行舟。占文寧謂偏私畢。辨土難期大有秋。涼德小臣慚負職。海疆兩廩

九重憂。

一片波光望渺然。巨區撮壤可能填。頓消地力無毛土。羣仰

天儲續爨烟。八載神功空禹跡。九河霸術擴齊田。天津爲九河下稍。只今

疏淪如堪傲。敢憚胼胝說距川。

滔滔四野歎淪胥。

帝澤汪洋更有餘。粟截畿南籌緩急。

先奉截漕數十萬於津倉以備需用。商通關左

劑盈虛。偏災疊歲何堪命。

大賚回天奠厥居。慶爾生逢

聖明世。不教羸弱轉溝渠。

時雨初霽郊行志喜二首

朱奎揚

入夏炎熇烈。平疇土欲焦。

恩膏重有詔。甘澤遂成謠。柳外扶犁出。橋邊舉網招。喜逢田父話。

涼意劇飄蕭。

雲淨碧天曠。驅車爲啟顏。蛙聲喧隴畔。日影澹林間。但卜

倉箱慶何辭泥淖艱。政成非易事。民樂暫心閒。

淨慈寺

查昌業

亭亭慧日峰。招提在其抱。側足翠屏閒。湖山莽寒照。午後一聲鐘。惺然發塵覺。昨夜山雪深。巖溜飛晴瀑。

先叔母浦恭人殉節詩亡失已久。吳東壁手書見示。哀痛之餘。作詩酬之。

查昌業

患難全貞烈。衷心自作銘。經年亡手澤。削跡痛幽冥。珍重書斑管。游揚播汗青。感君彰隱德。奕葉被芳馨。

謝同人褒揚家母苦節

查昌業

鴻篇今日錫鄉賢。敢望他時太史傳。憂患半生完苦節。詩歌一帙慰餘年。長叨鳳紙書銀管。不數冰桃薦綺筵。珍重琳琅藏古錦。翠珉留付子孫鐫。

堤頭晚歸

姜森

一棹橫秋水。蒼茫渡晚烟。雲陰融岸樹。燈火靜漁船。路怯新橋窄。村憐野潦穿。歸蹤徒踽踽。躑躅斷澗前。

西沽

施士鑑

停瀕郡西畔。解渤水東隅。橫帶五千淀。遙隣七十沽。上游收潦瀆。南泊瀉葫蘆。合作朝宗勢。平成溯禹謨。

泛望海寺至香林苑觀衛白二河交會處 金相

停舟碧綺寮。憩跡青華觀。晴州羃花積。宿靄延林散。緇廬
改新制。檻櫺溢璀璨。開門見大河。日夜納漫汗。京西三百
川。一氣總輸灌。呼吸走風雷。憑陵倒滄瀾。經營一失宜。黿
鼉窟高岸。昏烏萬檣宿。晨火千家爨。保障有賢臣。園葵敢
興歎。

扈從

御舟渡河

運同 孟淦

黃黃河水流。六斗泥可計。我聞昔人云。是水來天際。天際

不可窮到此分涇渭。撼波耀日光。一落千丈勢。波落忽橫
流。波回響澎湃。恍若駿馬奔。疾馳莫能御。又若猛虎行。山
林皆震怒。巨舟渡此間。劃然判其界。滾滾百里餘。滔滔無
阻滯。宛爾游龍游。游龍瞬息去。朔風聲不聞。洪濤勢以細。
靄然來黃雲。觀者如趨市。兒童走街巷。男婦不暇避。父老
皆歡言。萬年莫能遇。遇此萬年春。舉國若爲戲。迢迢三千
里。余獨躬其事。

御舟至臨清守淺是夜水忽逆流舟從而去東人傳以爲美談

云

孟淦

自古臨清水。滔滔流西北。

龍舟來臨清。潺湲水無力。須臾蛟龍至。攜水中流逆。逆水送行舟。百里來頃刻。勢如萬山奔。洶濤欲澎湃。眼界曠然清。轉頭境忽失。時已過東昌。山暮日將夕。但聞東人云。臨清水。仍涸。

孟公橋

家大人佐漕時所擬

孟淦

昔年我作津門遊。津門滔滔津水流。中有長橋偃波臥。天矯宛若游龍游。橋長水長勢摩盪。石澗金隄光潋滟。烟蘆水竹秋滿前。千村萬落背還向。平湖油油碧于醅。滌洄十

里橫歌舫津門士女來橋頭。橋頭如市壹何壯。大車小車
絡繹行。我時下馬歆郵亭。試問此橋矧誰氏。津門父老羣
誇稱。誇說此橋非從古。太谷孟公所落成。落成到今三十
載。此橋卽以公爲名。君不見橋之東南峻嶒第一碑。仁風
惠政誰所遺。又不見河之西北兩岸木森拱鬱鬱葱葱誰
所種。而我聞之絕不言。徘徊徙倚橋之闌。縱酒放懷留十
日。二三知己從追攀。歸來登堂告我父。津門勝事從頭數。
我父聞之笑不鷹。扶筇極目臨烟浦。

帶經堂自題

孟 淦

陋室非新構。從今額小堂。鐘聲戶半月。雁跡一簾霜。石古
塵封墨。書殘蠹滿囊。何遺琴在抱。分付好收藏。
堂前亦可鳴琴。即先大夫手額也。

舟次望海

孟淦

極目長窮坐小舟。浮天無岸水悠悠。半鈎月下千峯聳。萬頃波中一葉流。霧氣忽開通海市。山風初起覆重樓。石橋凌處今何在。曾否當年到十洲。

庭樹

樹在北司蟬旁。先大夫手植也。

孟淦

森然喬木已成林。為愛青葱坐小岑。卅載向榮非有意。一

枝庇蔭到于今。漫趨庭下慙寒歲。偶過階前趁午陰。昔日
鳴琴曾對此。不知果否是知音。庭卽先大夫鳴琴處。

浮橋步月

孟淦

連綿雨後水雲開。白板橋頭渡幾回。午夜星河空萬籟。平
潮湧月海門來。

登觀海臺

孟淦

觀海層臺上。遙天其水長。波搖涵渤碣。日動見扶桑。出沒
雙潮地。空濛萬古鄉。魚鹽常賴此。極目意茫茫。

鹹水沽聞蟬

孟淦

詩
淺深沾上雨初收。特向津門放小舟。借得半帆風正好。綠陰濃處一聲秋。

孟公橋夜眺

孟淦

信步浮橋上。茫茫眼界清。月殘村舍黯。風定海潮平。穩渡先公跡。安瀾赤子情。坐聽垂釣者。還說舊家聲。

丁貞女詩二首

崔緒振

蘭蕙期同秀。吾生何不辰。未爲比翼鳥。便作未亡人。成此百年信。來舉總帳新。哀哉慈母別。忍淚向蒼旻。

未識夫君面。誰言恩愛縈。守身惟見義。大節不關情。休道

九泉隔應憐太璞貞清風傳海宇萬里達蓬瀛

初夏與顧方來羅近齋晚登玉皇閣

查善和

昔聞古剎城之東中有高閣凌天風一客攜手相呼引足
履危梯雙睛矇攀援有如猱升木轉輾不異鳥入籠須臾
山河大地見如駕鵬翼憑虛空是時昏黃冰魄湧金波尙
弄海水紅長河繞郭千里瀉高城枕水百雉雄俯視廣廈
千萬列謂是大賈王侯同吁嗟此身一稊米蟻穴富貴如
轉蓬登閣足令須彌小牛角何必相戰攻持此欲問泰山
叟奚事驅車浴龜蒙

行宮初竣恭賦

查善和

七十二沽古水鄉東連巨浸波濤長間有池館開道旁參
天萬柳秋蒼蒼潞河日下遙相望舳艫千里啣帆檣清波
一棹隨風颺濯纓令我思滄浪

天子重念薄海疆

詔疏禹績傾倉箱視民所在如有傷

翠華親駐臨康莊百工子來奮鍤忙平蕪不日起畫梁溫宮窈窕
達洞房曲院掩映通修廊闌干鏤玉棲鴛鴦殿閣錯金蹲
鳳凰其西綠竹交琳瑯清颺習習水榭涼萬絲烟雨垂弱

楊俯瞰十畝方池塘松濤過耳同笙簧飛樓仰視雲中翔

中臥古柳山之陽癰腫何止千歲強海棠一染

天藻香

有書海棠廳

御春風特地驕紅粧遙憶來年時

省方水蒐三月魚龍藏河伯不敢恣狂猖

御舸中流飛蓋黃羽林雲屯鷹隼揚森立豹尾輝旂常比來經
始雜士商觀者不禁如堵牆徘徊徙倚等望洋神飛色動
空徬徨扁舟歸去興未央霜天新月烟蒼茫

劉節女

查善和

女爲海豐場之竈莊人八歲夫沒以父母無子忍死奉

親十四年。媒妁欲奪其志。乃死節。同人以詩文弔之。
死非甚難事。惟其義之難。當其就死。意甚烈。千人駭目。萬
口謹。豈知經營死之所。柔腸一日千迴盤。快然仁至義已
盡。其心乃如古井之水。不復生波瀾。我讀劉女死節事。此
事未可作烈觀。八齡何知從一訓。其人未成其天完。飲泣
吞聲十五載。惟孝與節兩不刊。豈若世間徇名輩。外則甚
彊中已乾。艱難宛轉卒償志。勝彼豫讓之報智。伯荆軻漸
離。酬燕丹。士夫好奇辨一死。聞其說者膚毛寒。吁嗟乎其
死之烈。何慷慨其生之心。尤辛酸。

春日西沽晚眺

金銓

佳色自相招。閒吟過石橋。明朝足暮雨。一夜長青苗。岸柳低殘照。墟烟帶晚潮。興闌歸步緩。處處見漁樵。

大沽觀海

天津知縣
李符清

蒼茫海氣接長空。蛟室龍堂縹緲中。萬片風帆天上落。疑從雲際看飛鴻。

海光寺晚眺

李符清

三津風物似南天。徙倚高樓思渺然。七十二沽秋水濶。夕陽爭放打魚船。

淀河卽目

李符清

兩岸垂楊挂落霞。捕魚小艇傍人家。閒鷗也畏忘機者。飛入前洲蘆荻花。

王貞女詩

有序

李符清

貞女王秋坪觀察之愛媛。余姻親莊栗堂運同之子婦也。未嫁。莊生歿。貞女誓不改適。栗堂聞之迎歸。以哭夫致疾。未幾卒。

貞女瑯琊王清門嫺禮儀。幼許字莊氏。兩小未結褵。父爲觀察。舅運使。問名納采。加儷皮。誰知鴛鴦鳥。雄歿惟存雌。

一解莊生翩翩正少年。玉樹中折吁可憐。齒計來到門。貞女

聞之掩袂涕泗漣。生已許作莊家婦。豈以既死忘所天生

當奉君舅死。當下從地下黃泉。二解未嫁夫死。文載禮書。斬

衰而弔。既葬而除。貞女豈必不知此。至性所激。禮可踰。三解

從一而終之死。靡悔耳中。但記莊生名。此外何曾有連理。

妾心已作枯井水。四解阿舅大歡喜。歡喜復酸辛。備禮迎歸。

是日觀者填通津。憑棺哭夫婿。上堂奉晨昏。貞女今稱未

亡人。五解婉婉溫恭幽閒窈窕。未事先姑。克和邱嫂。六親仰

之。女師女表。六解人謂貞女宜享修齡。豈知貞女不願生。百

年一瞬總歸盡松柏彫矣留餘青

七解

生不同室死則同穴

夜臺庶可慰蕭瑟雖死之年猶生日吁嗟乎貞女烈婦合

爲一我爲歌之永貞烈

八解

紀

恩詩

乾隆三十六年

聖駕巡幸天津蒙

恩賞朝珠貂皮緞匹荷包等物謹賦詩恭紀

拔貢生臣 朱 晉

聖主當陽日羣公輯瑞年省方畿左輔問俗海東偏耆老瞻

龍仗商民拜

鵠船。

恩綸中使出。

賜賚尙方傳珠串。牟尼燦。豐貂潤色鮮。花分文綺疊。佩結紫囊圓。

其沐

恩施普。還期報稱虔。章身真挾髓。濡筆記瑤編。

乾隆四十二年四月

聖駕巡幸山東

回鑾幸天津蒙

恩賞墨刻九老會詩貂皮緞匹荷包等物謹賦詩恭紀

生員臣 郭 淳

鑾輿旋蹕泣三津。到處歡聲擁萬民。共仰

天顏知有喜。爭傳

與命復重申。引年好續唐賢社。勒石欣看

聖藻新。捧到珍裘殊翡翠。擎來美錦燦麒麟。玲瓏珮結金絲艷。搖

曳囊依紫綬。勻總爲

至尊符樂愷。遂教

恩錫逮冠紳。藏之什襲誇東壁。報以歌謳叩

北辰其戴

皇仁叨

寵渥無疆長奉萬年春。

乾隆五十年正月

恩宴千叟於

乾清宮蒙

恩準入宴

賞墨刻千叟宴詩如意壽杖緞匹錦絹紙筆墨硯烟壺荷包等物

謹賦詩恭紀

舉人臣
楊伯璵

壽宇開

皇極

推恩紀大酺。

法宮森洞啟黃髮儼前趨。禮數寬逾謹。珍肴美更腴。何期登

禁苑。竟爾飫

天廚。既醉方申祝傳

言若唱臚。

鴻文千叟宴錦軸滿囊珠。如意憑歡舞。筇枝許共扶。三英宜作服。

賜寶槐研朱更有連城品。還同繡纈俱。一時齊下拜。

九陛聽嵩呼。時際青陽暖。年逢大衍符。葵衷無以報獻

壽頌璇圖。

乾隆五十三年二月

聖駕巡幸天津蒙

恩賞宴於

柳墅行宮並

賞朗珠貂皮緞匹荷包等物謹賦詩恭紀

廩生臣 王有源

別館臨畿甸春和肅綵旄江花依水發御柳拂雲高遇

賞因開宴啣

恩遍

賜醪坐依

仙仗近。歡戒語聲。豈獨分甘。涯還同錫貢。以彰施真。藻采。
寵賚勝綈袍。祇以葵衷切。常承。
黼座褒。飲和兼食德。謗劣愧濡毫。

乾隆五十五年八月恭逢

皇上八旬萬壽長蘆淮浙各商恭辦

慶典祝

釐仰蒙

特恩賞看大戲於

同樂園自辰至申刻漏五轉蒙

賞克什三次乳茶清茶三次得觀萬國來朝普天同慶等戲劇草

茅欣邀

異數頂感難名謹賦詩恭紀

柏梁體二十八韻

拔貢生臣

朱晉

歲在庚戌之仲秋。

聖人萬壽符箕疇。八旬行

慶施惠周。蠲租減賦

愷澤流。五風十雨年豐收。四民康阜遵道由。普天率土呈其球。鹽

絺絲泉通車舟。長蘆三輔連

皇州山呼廟列封人儔。

詔許中禁隨娛遊。席地列坐。

恩殊尤。

園開同樂排伶優。飛仙伽利臨瀛洲。烏衣卉服兼罽裘。崢嶸
海市森蜃樓。儼然王會圖。傳郵八風諧。暢音和柔頻。

賞克什臚珍羞。雲漿霞乳盈磁甌。三清玉茗香氣浮。自辰達申五
轉籌。小臣頂戴。

天恩稠草茅培植逾薪樵。涓埃涖髓何能酬。含哺頌叶康衢謳。
昇平億萬。

福祿道永與

天地同其悠

康生臣
張永銳

維

皇建極盡朝宗

壽宇宏開拜

九重南朔貢珠囊

盛典臣民祝嘏慶時雍
臚歡正慰康衢願

錫燕欣看樂部從
方聽簫韶諧律呂
俄驚曼衍戲魚龍
冠裳輻輳

圖王會草野趨蹌識

聖容香茗捧來仙液貴。珍饈分處膳夫供。頻移刻漏傳銀箭。屢聚

醍醐玩玉鐘。坐久幾忘依

闕近歸遲更覺受

恩濃躋堂漫詡當年樂。在藻真誇此日逢。長紀賡颺綿億載。

太平歌舞遍堯封

乾隆五十九年

聖駕巡幸津淀長蘆商人

臣宗澄承修

御船交送至趙北口差次得隨鹽臣徵瑞跪迎

鑾輅恭觀

天顏謹賦詩恭紀集唐人句十二韻 康生臣 樊宗澄

睿德揔無邊李觀風五教宣張說發生同化育許敬宗舞詠溢郊鄆杜審

言都邑羣方首張說魚鹽舊產傳沈佺期天津轉明鏡裴守真金

岸引行旂李敬立

駐輦華林側太橫舟涿水前李百藥油雲陰御陌虞世南梅雨灑芳田

太柳色勻三月李百藥歌聲徹九天盧照鄰拜迎彌道路杜審

率舞悅

壽年胡元莫以崇班闕杜審言欣逢榮耀全宋之問類從皆有

召蘇頌

王道固無偏張說

寵命垂天錫源乾曜康時洽賞延杜審言顧惟誠濫次陸堅微物荷陶甄

杜正倫

乾隆五十九年

聖駕巡幸天津蒙

恩賞墨刻十全記墨刻十全老人之寶說

御書福字貂皮緞匹寧綢帽緯荷包等物謹賦詩恭紀

廩生臣

樊宗澄

無逸

宸衷切。

時巡豈憚勤。允符千載治。

親灑十全文。

錫福同中外。承

恩及組纁。冠纓齊耀采。囊佩總含芬。懸壁蛟龍護。開函艾納薰。便

蕃思寸補。

寵眷信稀聞。

聖德天行健。微躬喜色欣。同聲歌湛露。拜手望彤雲。

乾隆五十九年恭逢

聖駕巡幸天津得隨鹽臣徵瑞恭辦

行在宮門差務仰蒙

恩準加級並蒙

賞克什謹賦詩恭紀

長蘆候補知事臣

高泰瓚

近畿

時邁駐瀛津。淑氣陽回柳墅春。五載欣重瞻

日月。九霄掄值傍勾陳。叨承克什分甘永。優敘微勞晉秩頻。何幸

小臣逢

王... 紀恩詩

異數擬將高厚頌

洪鈞